

ULMA TALDEKO BESTE TALENTUAK

MONDRAGON C.F.KO JARRAITZAILE IZATETIK LEHENDAKARIRA!



—
XABIER ETXEBERRIA
ULMA PACKAGING

“GAZTETXOAK ITZULI DIRA, GAZTEAK ANIMATZERA JOATEN DIRA, ETA HORREK POZA SORTZEN DU FUTBOL KLUBEAN”.

—
Xabier Etxeberriak ULMA Packagingen egiten du lan 2016tik, dokumentazioaren arloan eta duela 4 urtetik MONDRAGON C.F.ko lehendakaria da.

2015ean hasi zen Mondragon Futbol Klubeko zuzendari taldean, urte pare batez sortzen zen guztian laguntzen. *“Hemen laguntzeko sartzen zara, zertan sartzen zaren oso ondo jakin gabe”*, adierazi digu Xabierrek.

Xabier zein Zuzendaritza Batzordea osatu zuten pertsona guztiak Klubean sartu zirenean zuten asmo bakarra zen kirol kudeaketan laguntzea, kudeaketa ekonomikoan, babesleak bilatzen... Bi urteren buruan, Zuzendaritza Batzordeak lehendakari izateko aukera proposatu zion, artean Mondrako lehendakari Ramon Azkarate kargua uztekoan zegoela eta. Ramonek hainbat urte zeramatzan lanpostuan eta erreleboa nahi zuen. 2017/2018 denboraldian, Xabier lehendakari kargua eskuratu zuen, eta gaur egun arte dabil horretan.

“Esperientzia polita, bizia, estresagarria, aberasgarria... izaten ari da, eta adjektibo gehiago jar ditzakegu, baina, oro har, esperientzia oso positiboa izaten ari da”, kontatu du Xabier.

ULMAko lana Mondragon Futbol Klubeko lehendakari karguarekin

bateragarri egitea ez da zaila izaten ari, baina ahalegin gehigarria da. Bi lan izatea bezala da, ULMAn lan egitetik ateratzen zara eta bigarren lanean sartzen zara, eta horri asteburuak gehitzen badizkiozu...

2020an pandemia hasi zenetik, klubak ziurgabetasun handia pairatu behar izan du egunerokotasunean; murrizketak, oro har, astean bitan ere aldatzen ziren. Batetik, Eusko Jaurlaritzak ezarritako neurriak, eta, bestetik, Arrasateko Udalarenak, udalaren instalazio bat erabiltzen baita (Mojategi): udalak berak adierazten ditu entrenamenduen baldintzak, aldagelen erabilera... *“Ezinezkoa zen ezer planifikatzea. Oso luze jo du”*, adierazi du Etxeberriak.

2020ko abuztuan, aurrendenboraldi hasieran, plangintzaren barruan lagunarteko partidak sartzen ziren kategoria bereko taldeen aurka. Lehen partida jokatzera zihoazela, aurkariaren taldeak deitu zuen esateko ezingo zutela jokatu taldean positibo bat zutelako. Mondragon Futbol Klubak partidarako dena prest zuenez, seniorren bi taldeek (Ohorezko maila eta Preferentea) elkarren artean jokatzera erabaki zen. Partidaren hurrengo egunean, jokalarietako batek positibo eman zuen, eta 22 jokalaria 10 egunez konfinatuta geratu ziren etxean. Egoera horren ondorioz, askok planteatu zuten futbola denboraldi

horretan edo pandemiak irauten zuen bitartean uztea, konfinamendu gehiagoren beldur zirelako eta, horrekin batera, lana galdu edo arazoak izatearen edo ikasketak atzeratzearen beldur zirelako.

Orain badirudi dena aurreko normaltasunera itzultzen ari dela, entrenamenduak lehen bezala egiten dira, talde osoak batera entrenatzen du, ez talde txikietan, aldagelak berriro erabiltzen dira, lehiaketak kategoria guztietan itzuli dira, zaleak itzuli ahal izan dira... eta hori asko nabaritzen da. *“Harmailetako giroa, ikusleen berotasuna eta animoak oso faltan bota izan ditugun zerbait dira”*, zehaztu du. *“Gaztetxoak itzuli dira, gazteak animatzera joaten dira, eta horrek poza sortzen du Futbol Klubean”*.